

ւունքները: Հայերի պահանջը նա համարում էր «միջամտութիւն Վրաստանի ներքին գործերին»: Բախումը դառնում էր անխուսափելի, և դեկտ. 13-ին բռնկւեց հայ-վրացական զինւած ընդհարումը:

Պատերազմը սկսելուց յետոյ էլ Հայաստանի կառավարութիւնը աշխատեց դռնել խաղաղ միջոցներ՝ վէճի լուծման:

Դեկտ. 14-ին արտաքին գործոց նախարար Ս. Տիգրանեանը Թիֆլիս ուղարկեց մի նոր դիմումնագիր, որով, ի միջի այլոց, գրում էր. «Վրաց կառավարութիւնը ո՛չ միայն ընդառաջ չզնայ մեր փափազին՝ սահմանների հարցը խաղաղութեամբ լուծելու, այլ և կամենալով ամբասնդել օտար հողի գրաւումը՝ ձեռնարկեց արշաւանքի խաղաղ բնակչութեան դէմ՝ ենթարկելով արինահեղ ու դաժան բռնութիւնների, մինչև իսկ հայկական գիւղերը թնդանօթիների կրակի մատնելով: Հայաստանի կառավարութիւնը չի կարող մնալ անկարեկից դիտողի դերում, որովհետև հարեան պետութեան զօրքերը սխրագործութիւններ են անում Հայաստանին պատկանող հողի վրա և զնդակահարում են Հայաստանի քաղաքացիներին: Իմ կառավարութիւնը՝ ջերմօրէն ձգտելով առաջն առնել ապագայ բարդութիւնների՝ ուզում է հաւատալ, որ ձեր կառավարութիւնը՝ յարգելով ժողովրդի բաղձանքն ու Հայաստանի իրաւունքը՝ կը փութայ սեփական նախաձեռնութեամբ դուրս հանել զօրքերը, հնարաւորութիւն կը տայ ձեր պատգամաւորութեան յարաբերութեան մէջ մտնել մերինի հետ, կը վերականգնէ հեռագրական կապը և դրանով կամրացնէ երկու հարեան հարազատ պետութիւնների խաղաղ կենակցութիւնը»:

Այս դիմումն էլ մնաց ձայն բառբառոյ յանապատի:

Զինւած ընդհարման առաջին իսկ օրերին միջամտեց, այդ պահուն Ղարաքիլիսայում գտնուող, անգլիական սպայ կապիտան Գրինը, որ առաջարկեց՝ հայ-վրացական խորհրդակցութիւն կազմել և վէճը լուծել խաղաղ ճանապարհով: Հայաստանի կառավարութիւնն ընդունեց և Ղարաքիլիսա ուղարկեց մի պատւիրակութիւն, որի մէջ մտան՝ Մ. Յարութիւնեանը (նախագահ), Ս. Սաչատրեանը, Ս. Մամիկոնեանը, Ա. Սոնդկարեանը և Գ. Տէր-Սաչատրեանը: Միևնոյն ժամանակ, դեկտ. 18-ին, արտաքին գործոց նախարար Ս. Տիգրանեանը հեռագրեց Վրաստանի կառավարութեան. «Խորհրդի որոշումով կառավարութիւնն այսօր պատւիրակութիւն է ուղարկում կապ. Գրինի և Վրաստանի լիազօրների հետ միասին, եթէ վերջիններս դան, պատերազմական գործողութիւնները վերջացնելու պայմանները մշակելու համար: Մի պայման Խորհուրդը համարում է միանգամայն անհրաժեշտ. Հայաստանի կառավարութիւնն իր զօրքերը Բորչալուի գաւառից կարող է հանել միայն այն դէպքում, երբ երաշխիք ստանայ, որ այս, ինչպէս և Ախալքալաքի գաւառը կապահովեն Վրաստանի նոր յարձակումներից... Մեր պատգամաւորութիւնը ուրախ կը լինի հանդիպելու ձեր լիազօրների հետ, որպէսզի համերաշխաբար աշխատեն լուսագոյն պատմական աւանդութիւններով կապած և ընդհանուր մշակութային տենչերով համակուած երկու հարեան ժողովուրդները բարօրութեան համար»:

Այս դիմումն էլ անմիջական գործնական հետևանքներ չունեցաւ. վրացիները պահանջեցին, որ հայերը հեռանան Լոռիից, իսկ իրենք մնան Լոռիում և Ախալքալաքում: Բնականաբար, հայերը չէին կարող ընդունել